



# L Festival dl'Economia ence per ladin

Adum con i altri jornalisc él sté la redazion de Ercamedia che à produt servisc per Tml, Ercaboan y per la Web-Tv dl festival



**La redazion de Ercamedia, Matteo Ploner, Marilena Defrancesco, protagonisc ladins dl festival.**

**Trent** - Tl cheder dl Festival dl'Economia é i temesc de gran profundité ruvés al gran publich ence per ladin de grazia al gran laour fat da Ercamedia, la sozieté de produzion de Silvano Ploner. La redazion de Ercamedia se à tramudé per l'ocajon tles ciavenes dl palaz

dla Provinzia autonoma de Trent con na postazion aldò, adum con duc i altri jornalisc; ala à realisé cater "speziai", aprofondimenc monotematics de mes'ora vigni un y ala à mané fora ciamò vigni di does trasmiscions de n chert d'ora l'una te nost lingaz de mendranza.

An à podù vedei la produzion ladina per Tml, Ercaboan y per la Web Tv dl Festival, chesta ultima é ciamò a la leta sun l sit HYPERLINK "<http://www.festivaleconomia.tv>" [www.festivaleconomia.tv](http://www.festivaleconomia.tv).

En cont de chest él da sotlinié che l azes a la web tv é chersciù de

presciapuech l 240%, n dat che ti va do a la tendenza de internet che veid semper plu al prum post la doura di contegnus souraldut per images y videos respet al test, desmostran ciamò coche i joegn, chi che à plu confidenza con l web, mostre semper plu interes per l Festival.

Per duc i cater dis dl festival à tout sù Valentina Redolfi y Michele Carpano dla redazion de Ercamedia, adum con doi cameramen Marco Roccella y Diego Baldessarri, y con la colaborazion dl espert ladin Matteo Ploner, nia demé informacions sun dutes les conferenzenes y les scomenciadives culturales y de aprofondiment, ma ence sun dut chel che al fova y che al suzedova entournvia, dal da fora dl festival, con intervistes a la jent che laora o che vif ilò davejin.

Matteo Ploner da Dèlba, che ti

à dat n contribut truep emportant a la produzion de Ercamedia tla realizazion di aprofondimenc, à n curriculum de gran peis: do avei giaté la laurea en economia a Trent dl 2002, àl colaboré con l professor Werner Güth al Max Planck Institute de Jena tla Germania; dl 2005 él sté ence "Visiting Fellow" a l'Université de Harvard. Dl 2006 àl sclut su l dottorat de enrescida al Istitut Sant'Anna de Pisa. Encuei él enrescidour assozié a la Facolté de Economia de l'Université de Trent y al se cruzia de preferenzenes soziales.

Ma Matteo Ploner ne é nia l soul protagonist ladin dl Festival dl'Economia: al é da recordé ence Marilena Defrancesco da Moena, che é responsabla per i Gagn Evenc dla Provinzia autonoma de Trent y che à abù na pert de gran emportanza per assecuré l bon garat dla manifestazion.